

Yd  
226

Ein geistl. Trost ...



Q.K.



**Ein geistlicher trost die-  
ser betrübten Magdeburgischen Kirchen  
Christi / das sie diese Verfolgung  
vmb Gottes worts / vnd keiner an-  
dern vrsach halben / leidet.**

Durch Matth. Fl. Illyr.

ij. Cor. j.

Wir haben vns müssen des lebens erwecken / vnd bey vns be-  
schliessen / das wir müssen sterben. Das geschach aber darumb / das  
wir vnser vertrauen nicht auff vns selbs stellen / Sondern auff Gott /  
der die Todten aufferwecket. Welcher vns von solchen Tode erlöset  
hat / vnd noch teglich erlöset / vnd hoffen auff ihn / er werde vns auch  
hinfurt erlösen.

Auswendig streit, indwendig furcht.



Die weisen Heiden pflegten zu sagen / das vnglück kan nicht grösser noch bitterer werden / denn wens so fern kömpt / das einer vber alle andere beschwerung / schaden / jamer vnnnd elend / dencken mus / es geschehe ihm recht / vnnnd sey nicht werd / das sich jemand vber ihn erbarme.

Also mögen wir Christen mit warheit wol sagen / das dis die aller gröste vnnnd bitterste pein ist / damit der Teuffel vnns engstiget / wenn er vns vber allen andern jamer vnnnd elend / auch das gewissen betrübt / vnd irrig macht / Vnd also allen Göttlichen trost / ia Gott selbst dahin reisset.

Solchen grossen jamer sehen wir teglich an vnns für augen / vnnnd fürens mit grossem schmerzen. Denn weil das leibliche Creutz teglich zunimpt / So kömpt der Teuffel vnnnd böse leut / Item etliche andere / die wol nicht so gar böse / vnd doch vberaus vngeduldig sein / dieselben wollen vns mit gewalt vberreden / das wir leiden / nicht vmb Gottes worts willen / sonder vmb andere / weiss nicht was für vrsachen / die ihnen etliche hie vnd dort / wie es inn der vngedult pflegt zu ergehen / ertichten. Vnd das wir derhalben nicht hoffen dürffen / das vnser Creutz Gotte gefalle / oder das wir hierin trost oder hülffe / von Gott zu gewarten haben.

Durch diesen griff / raubt vns der Tausentkünstiger der Teuffel / nicht allein die gegenwertige gedult vnnnd ruge vnser hertzen / Sonder auch allen trost / hoffnung Göttlicher hülffe / vnnnd das Gebet / betrübt auch inn der frommen hertzen den heiligen Geist. Daraus denn erfolgt / das wir von Göttlicher hülffe verlassen / vns mit harn vnd kummer fressen vnnnd verzeren / mit Gott zürnen / widder Gott murren vnd grisgramen / Vnnnd also inn stetiger bitterkeit vnnnd hertzeleid / nicht anders denn wie die Teuffel / vnser leben verzeren. Denn die Teuffel / weil sie wissen / das sie gesündigt / vnd keine gnade / onder viel mehr den ewigen zorn von Gott zu gewarten haben / So zürnen sie mit Gott / Enirschen mit den zenen vnd lestern ihn / beissen vnd fressen sich selbst mit stetem trawren vnd schmerzen / gleich als mit einem

mit einem Wurm ( wie der Prophet sagt ) der sie stetz an ihrem herzen naget.

Widder diese grosse vnd geistliche anfechtung / die wir vns entwedder selbst anthun / odder von ander Leuten anthun lassen / welche vns mehr hertzeleid bringt / denn alle wütereij vnd toben der Feinde / Wil ich etliche wenig gründliche troststücke anzeigen / damit sich die Christen in dieser trawrigkeit vnd jamer trösten / vnd widder die fewrige Pfeile des Satans schützen mögen.

**U**m ersten / wissen wir alle sampt / die es nur wissen wollen / das wir sampt andern Nachfolgern der waren Christlichen Religions / nu vber die xxx. Jar / vnser Widderfacher demütiglich vmb friede gebeten haben / Haben auch allen weltlichen gehorsam angebotten / vnd noch. Darumb were es ja für Gott vnd allem recht billich gewesen / das man vns / die wir so lang on vnterlas vmb friede gebeten vnd geflehet haben / friede gegeben hette / wenn wir gleich Türcken oder Tatern were. Solchs aber hat vns nie nicht kunt widerfahren.

**U**m andern / ist öffentlich am tage / das wir vns mit keinem Menschen je verbunden haben / vnsern Feinden / vnd widersachern / oder einigem menschen auff erden / einigerley weise schedlich zu sein / Sindts auch nie gewesen / biss so lang / das wir durch gewalt vnd grausamheit vnser Feinde / zu dieser notwendigen gegenwehr gedrungen sein.

**U**m dritten / weis man / Das wir / nach dem wir zu dieser gegenwehr durch gewalt der Feinde gedrungen sein / nichts zu grausamlich noch schrecklich vorgenommen / Sonder viel mehr / durch nachlessigkeit / lindigkeit / vnd gedult gesündigt haben / denn durch Tyranny oder grausamkeit / welchs vnser feinde selbst bezeugen / vnd vns derhalben barmhertzige Krieger heissen.

Noch dennoch sind etliche / die aus bitterm hertzen auff vns dringen / vnd vorgeben / wir sein nicht vnschuldig / Sein nicht ganz one Sünde / Vnd nicht so gar rein / wie wir meinen / Haben auch inn diesem oder jenem gesündigt / etc. Antwort / Wir bekennen vnd sagen frey / das keine menschliche handlung / wie gut sie auch immer  
A ij ist / ganz

ist/gantz one Sünde sey. Viel weniger kans im Kriege so gar gerade vnnnd schnurrecht zugehen. Denn ob der Krieg gleich am aller rechtmessigsten vnnnd gelindesten ist / So ist doch seine art vnnnd natur nicht anders/denn das er die Leut beschedigt.

Es solten aber solche fromme Leute/ die vnser Sünde so fleißiglich zusamen klaben / bedencken / das die gerechtigkeit oder vngerechtigkeit der Kriege / erstlich vnnnd vornemlich von der heuptsache/ als von einem brunnen herflusset / wenn sich gleich sonst idarnach etliche ding zufelliger weise / nicht gantz eben zutragen / sonderlich von einzelnen Personen / da einer dis / der ander das zuweilen suchen mag / Sie solten bedencken / sag ich / ob dis nicht die vrsach vnnnd vrsprung des Krieges ist ( welchen vns die verfolger Christi / nu inn die xxx. ganzer Jar gedrawet vnnnd endlich ins werck gesatzt haben ) nemlich / das wir vnns von dem Papst abgesondert haben. Item / ob dis nicht das ende dauon ist / das sie die wahre Religion vertilgen / vnnnd des Papsts Abgötterey widerumb auffrichten vnnnd erbawen wollen / vnnnd vber das / die Freyheit Deudscher Nation / dem Antichrist vnnnd seinen Dienern vnter die Füß werffen ? Dargegen aber ist vnser wünsch vnnnd beger in diser Defension nie nichts anders gewest / denn das wir möchten behalten den Lehrer ( wie Esaias spricht ) vnnnd brot inn angst / das ist / die ware Religion / vnnnd das teglich brot inn vnser alte freiheit.

Darumb möchten sich die klugen Leute / die vns arme Christen wissen streng vnnnd so genaw zu vrteilen / wol bedencken / aus wasserley vrsachen sie vnser Widderfacher vornehmen inn diesem Gottlosen Kriege loben vnnnd fordern / vnnnd vns arme Christen verdammen. Es werden nimmermehr so rechtmessige vnnnd grosse zufell sein / die diesen Krieg der Gottlosen / zu vnterdrückung der Religion Ihesu Christi angefangen / rechtfertigen können / Es werden auch vnser Feile / so sich etwa in diesem Kriege zugetragen möchten haben / diese inn allen / auch natürlichen rechten erleubte Defension nicht können zur Sünde machen. Weren vnser Feinde inn solcher gelegenheit / so vnbilliglich / vnnnd so lang inn der Acht gewest / vnnnd so sehr beschediget als wir / sie würden wol anders vmb sich gegriffen haben / wie leichtlich zugebencken.  
Aber

Aber es ist das rechte vrtail vnnnd die rechte straffe Gottes / das diejenige / so der armen Christen bestendigkeit vnnnd notwehr vmb etliche geringe Sünde / aus furcht oder begir eines stücks der Kleider Christi verdammten / der verfolger wütterey vnd grawsamkeit fordern vnd helffen / oder zum wenigsten loben müssen.

**Z**uletzt / weis jederman das man vns nie keinen friede hat zusagen wollen / wo wir vnser Religion nicht wolten faren lassen / Wils auch noch auff diese Stunde nicht thun. Vor zweien jaren haben die gesandten erzlicher Stedte / auff bitt dieser Stadt / angesucht / das man vns doch friede geben / vnnnd diese Religion lassen wolt / vnnnd zum Interim nicht zwingen. Da ist ihnen diese antwort worden / Ja / man wird ihnen ein sonderlichs machen. Also werden vns noch auff den heutigen tag solche Artickel vorgeschlagen / darin klerlich begert wird / das wir inn die zween nechste abschiede des Reichstags / darinn das Interim vnnnd Bepffliche Concilium zu Trient begriffen ist / willigen sollen.

Das man vns aber lassen wil diese Religion / das ist ein verdecktig ding. Denn erstlich wollen sie ja / wir sollen vom Keyser friede begeren. Was kan man denn widder des Keyser willens? Können sie doch selbst des Interims nicht vberhaben sein. Zu dem / wie ist doch gleublich / das es ihnen ein ernst sey / die wahre Religion bey vnns zu erhalten / so man doch dem Keyser zugesagt / das Interim vnnnd Concilium anzunemen / wie die öffentlichen vnnnd besondern hendel des Reichs bezeugen.

Darumb ist so klar am tag / wie die helle liechte Sonne / das dieser Krieg vnd diese verfolgung herkömpt / von wegen des Euangelijs Ihesu Christi / Vnnnd das wir inn vnser notwehr nicht zu viel gethan haben / Vnnnd das wir / weder zuuor / noch auff diesen heutigen tag / können oder gekont haben von diesem Creutz erledigt werden / Es were denn / das wir das Euangelion Ihesu Christi verwerffen wolten. Darumb leiden wir warhafftiglich von wegen der Religion Ihesu Christi. Doch / ob etwa einem diese wolgegründte vrsachen noch nicht gnug weren / der mag diese folgende drey auch darzu nehmen.

**D**ie Erste / Zette diese Stadt mit irem Exempel vnnnd besten /  
digkeit / Item mit abdruck Christlicher Schrifften / der Pa /  
pistischen betriegerey vnd verfelschung nicht widerstanden /  
so hette das Bapsthumb durch seine mannigfaltige Interim vñ Mits /  
telding / das Euangelion Ihesu Christi lang ausgestossen / vñ die Kir /  
chen widder eingenomen. Solchs bezeugt die öffentliche erfahrung  
bey jedermenniglich / der vmb die hendel Deudches Landes vergan /  
gener vier jar nur ein wenig wissenschafft tregt. Derhalben alle Kir /  
chen / die noch etwas von der waren Religion behalten / die haben  
solche wolthat / von den gnaden GOTTes / durch vnser mühe vnnnd  
Creutz empfangen.

**D**ie ander ursach ist / das wir selbst vnd jederman ( wenn wir  
nur wollen die warheit sagen ) nicht anders dencken / noch inn  
vnserm gewissen anders befinden können / denn das nach vn /  
tergang dieser Stadt ( da Gott gnediglich vor sey ) das Bapsthumb  
allenthalben würde wider auffgehen. Ich rede so fern / als mensch /  
liche vernunfft erreichen kan. Denn Gott ist nichts vnmüglich / Vnd  
wie er erstlich durch den Churfürsten des Bapsts vornemen gesteu /  
ret / vñ nach seinem fall diese Stad wider den Bapst erweckt / Also kan  
er noch wol / wenn wir gleich vnterligen würden / etwa einen andern  
widder den Antichrist erwecken / oder seiner durch die zukünfft seines  
Sons ein ende machen.

**D**ie Dritte ursach ist / das alle rechtschaffene Christen allent /  
halben an allen örtern / eintrechtiglich durch den heiligen  
Geist in irem hertzen / vnns diss zeugnis geben für Gott inn  
irem Gebet / das wir vmb Christus willen leyden / Vnd bitten derhal /  
ben mit ganzem ernst / das vns GOTT gnediglich erhalten wolle.  
Solchs haben vnser viel vor der belagerung gehört / vnd auch schrifft /  
lich vernomen / Nach der belagerung aber / ist jr Geist viel brünsti /  
ger für vnns zu bitten / wie wir von vielen / die von mancherley örtern  
hierin komen / bericht werden.

Dieser leute vrteil / vnnnd eintrechtigs seuffzen für vnns gegen  
Gott / welchs nicht aus menschlichen gedancken / sonder viel mehr /  
aus dem



aus dem heiligen Geist her kumpt/sollen wir ja billich (haben wir anders noch ein tröpflein Christlichs geblüts inn vnsern hertzen) mehr glauben/vnd achten/denn der spotterey / verhönung / vnd blutige stiche/der Römischen Kriegsknechte/welche grosse heiligkeit/Christlicher liebe/vnd beständigkeit vorgeben/inn dem / das sie Christo eine Dörne Cron auff setzen / ihn mit Purpur zum gespött bekleiden / ein Scepter von Rohr inn die hand geben / vnnnd darnach mit guthen backenstreichen / zu ihm sprechen/Sey gegrüßt lieber Messias.

**H**ier kumpt aber der Teuffel vnd vnser alter Adam / vnd bringt mancherley einrede. Vnter andern sagen vnser Verfolger/Sie haben auch die ware Religion. Antwort/Ja/sie habens/nach dem Buchstaben / des krasst sie doch mit der gegenthät verleugnen/vnnnd wes sie des noch haben / das haben sie / nicht durch ire/sonder durch vnser Creutz/mühe vnnnd erbeit/ Vnd wider alle iren willen vnd vornemen. Denn man weis wol / wie hoch sie sich zum mehrern teil befließen haben / das Papstumb widder auffzurichten. Vnnnd geben vns nu dieser grossen wolthat halben / solchen schönen lohn/wie vor augen.

Item/ auch wir selbst machen vns solche gedancken / vnnnd reden dermassen widder vns vnnnd vnser lehrer / gleich wie Petrus / als er zu einem mühseligen Ampt vnnnd Creutz von Christo beruffen ward/sah er sich vmb nach Johanne / vnnnd sprach / Herr/was sol aber dieser ? Gleich wie die Kinder / wenn sie der Vater etwas heist/ das sie nicht gern thun/so sehē sie sich bald vmb nach einem andern/vnnnd sprechen/Warumb thut ers nicht ? Aber CHR Iesus antwortet/Folge du mir nach/So ich wil/das er so bleibe/was gehet es dich an. Gibt nu Gott ander Leuten die ware Religion / vnnnd legt jnen noch zur zeit kein Creutz auff/ Solten wir darumb von Gott abfallen/vnnnd vns selbst alles trostes berauben ?

Doch/so mans beim Liecht besehen wil/So haben sie die ware Religion/vnd friede/nicht so fest/durch ire sonderliche weissheit oder glück/ als dadurch/das wir fur sie / ja fur die ganze Kirche/jzt am Creutz stehē/Vñ ist doch daneben dis auch die warheit/dz irer viel das

Interim

Interim vnd Concilium gewilligt haben / ob sies gleich noch nicht auffgericht haben.

Aber der Teuffel vnd seine Kinder sind listig / die bestendigsten vnterstehen sie sich am ersten vnterzudrücken / darumb sie sie auch von den andern / damit sie nicht mit allen zugleich streitten dürffen / absondern. Also haben sie erstlich den Churfürsten hinunter gebracht / Also bekriegen sie itzund vns / vnd lassen die andern dieweil gehen. Solcher Gottloser anschlag ist wol vor etlichen Jaren auff der bahn gewesen / wie aus einer gedruckten Confederation der Papi- sten zuuernemen / Das man am ersten den Churfürsten vnd diese Stad sollte erlegen / vnd der andern verschonen / Wenn solchs geschehen / So wolten sie darnach leichtlich on alle mühe / die andern Kirchen auch dahin richten.

Ober diese jzt gemelte beweisung / das wir vmb Gottes Wort leiden / kondte man noch fünff oder viel mehr erzelen.

**D**ie Erste / das es Gottes gewonliche weise sey / das er immer vber etliche Jar lest seine ware Kirche mit dem Creutz der ver- folgung nur wol besuchen. Tu ist solch Creutz / nach dem Gottes wort allhie angenommen ist / bey dreissig Jar lang nie nicht sehr hart gewesen / denn eben diese fünff Jar daher. Darumb ist one zweiffel eben dis jamer das gewonliche Creutz / so Gott den Christen vmb die warheit willen zuleiden auffleget.

Aber den heuchlern / so vmb Gottes wort ganz vnd gar nichts leiden wollen / ist nie nicht zeit zu leiden / Wie man sagt / den faulen ist immer Feirtag. Vor fünff Jaren war es nicht zuthun vmb die Reli- gion / Also nach dem Kriege / da man das Interim der Kirche auff- gedrungen hat / Jzt ist es auch nicht. Vnd summa / So offte sich die falschen Christen aus dem Creutz ein wenig aufsdrehen können / wer- den sie sagen / es sein nicht Religions sachen / vnd were nicht von nö- ten / das wir eben darumb leiden wolten.

**D**ie ander beweisung ist diese / das eben die jenigen vnns jzt verfolgen / so sich allbereit mit verfolgung ander frommen Christen / mit verfelschung der reinen Religion / mit verglei- chung

chung mit dem Antichrist / vnnnd mit veriagung frommer Prediger /  
gnugjam / als rechte verfolger beweiset haben.

**D**ie dritte beweisunge ist diese / Das Daniel vnnnd die Offen-  
barung Johannis klar bezeuget / das nach dem der Antichrist  
geoffenbart vnd gestürzt ist worden / wird mit hülff der ge-  
waltigen einen rechten Krieg anfahren / mit der Kirchen Christi / vnnnd  
ihm also selber widder auff die beine wollen helfen.

Durch welche weissagung der heilige Geist / gleich als mit eis-  
nem Singer auff vnser jamer weist. Denn jzt ist nu die zeit / nach der  
offenbarung des Antichrists / inn welcher er sich durch Concilium,  
Interim, Adiaphora, Kriege vnd verfolgung der Christen / vn̄ allerley /  
practiken vnnnd wegen / widder zu seiner vorigen gewalt zu komen /  
bemühet.

Weiter zeiget auch die offenbarung mit kurzē wortē an / wie es  
inn demselben Kriege zugehen wird / als nemlich / der Bapst wird mit  
seinem Thier grossen sieg haben / vnnnd niemandt wird ihm können  
widderstehen. Zum andern / werden etliche wenige Christen besten-  
dig / Gottes hülff erwarten / wie sie sagt / Wie ist gedult vnnnd glauben  
der Heiligen. Zum letzten / zeiget sie an / das Gott die verfolger wird  
weidlich straffen / denn sie sagt / Wer getödtet hat / der wird getödtet  
werden / Vnnnd wer inn das Gefencknis geführet hat / der wird gef-  
fangen werden.

**D**ie vierde beweisung ist die erfahrung vnd das werck selbst /  
Frag du lieber Leser deine Augen vnd dich selber / ob du nicht  
siehest / das durch den Krieg diese fünff Jar daher das Bap-  
sthumb schier allenthalbē auffgericht / vn̄ das Euangelium ausgetilget  
worden ist. Frag dich auch selbst / ob du nicht siehest das durch die  
Kriege vn̄ Triumph der falschen Brüder die Papistische rotte gemeh-  
ret vn̄ auch erfrewet wird. Die fromme Christē aber allenthalbē gepla-  
get / bedrenget vnd dermassen betrübet / das man nirgent keinen from-  
men Christen finden kan / der nicht mit bitterm hertzen klaget / vnd  
zetter mordeio vber sie schreiet. Das werck / wie man sagt / lobt ia den  
meister / darumb frag man das werck vnnnd die erfahrung selbst / ob sie  
vns nicht vmb Gottes worts willen verfolgen.

**B**

Die

**D**ie fünffte beweifung ift/das den vorigen vñ itzigen Krieg/  
welcher ein ftück von dem vorigen ift/furnemlich der Papft/  
die Biſchoffe vnd Pfaffen erregt haben / darzu auch allerley  
hülff gethan/ia das auch der Papft ſelbſt mit offentlichen Bullen in  
Welfchlandt / an die Schweizer vñ anders wohin/ im vergangenen  
Kriege/vñ nach dem Kriege/von welche auch etliche von den vnſern  
widerumb gedruckt wordē ſein/ bekant hat/vñ bezeuget/das der ſelbi-  
ge Krieg auszureutten die Lutherſche Ketzerey erregt were / vñnd er  
darzu hülff vnd förderniß thete. Der Papft wird ia etwas vmb die  
ſache wiſſen? Was ift denn das / das ſich die falſchen Brüder  
wollen entſchuldigen/ vnd ſagen/ es ſey inn dem Kriege nicht Chri-  
ſtus verſolget worden/Odder wir auch die gerechte ſache Chriſti ver-  
dammen/falſch zeugniff widder vnſern nechſten / vnd vns ſelbſt ge-  
ben/vns teilhaſſtig machen aller mordt / vnd grausamer verſolgung  
der Kirch Chriſti / ia alles bluts der Heiligen/ das von dem gerechten  
Abel her durch die vnſchuldige Cainen vergoffen ift.

**D**iſer haben wir mit warhaſſtigem grunde beweifet/das wir  
dieſe zeit vmb Chriſtus willen gelitten haben/ vnd noch leiden.  
Darumb ſehet ein jeder zu/das er vermeide/ vnd mit allen Kref-  
ten von ſich treibe/ die fewrige pfeile des Satans / damit er vnns inn  
dieſem leiblichem Creutz/allen Geiſtlichen troſt / vñnd GOTT ſelbſt  
aus dem hertzen vñnd augen zu reiſſen ſich vnterſtehet. Denn ſo ſich  
einer vberreden leſt / das er vmb Chriſtus willen nicht leidet oder ſtir-  
bet/der leidet auch warhaſſtiglich nicht vmb Chriſtus willen / Son-  
der ſtirbt als ein Gottloſer/wie Paulus ſagt/So einer meint/er dürffe  
nicht fleiſch eſſen/ vnd iſſet es doch/der ſündiget warhaſſtiglich. Also  
nehmen wir vns durch vnſere Gottloſe vngedult nicht allein den leib-  
lichen troſt/Sonder ſtürzen vns ſelbſt ins ewige verdammis darzu.

Ach lieben Brüder / laſt vns doch diſ Creutz mit gedult tra-  
gen/vnd vns ſelbſt nicht gröſſer leiden an thun/denn die Feinde ſelbſt/  
Laſſet vns nicht vber den leiblichen ſchaden/den vns die Feinde zufü-  
gen/ auch geiſtliche anfechtung wiſſentlich vñnd williglich inn vn-  
ſern hertzen einreumen.

Die Apoſteln waren vorzeiten von hertzen fro / das ſie würdig  
wehren

wehren für die ehr Christi zu leiden. Aber sie sahen ihr Creutz an mit geistlichen augen. Wolt Gott/das wir den Teuffel vnd vnsern alten Adam/auch ein wenig von vns trieben/ vnser geistliche augen auffsetheten/vnnd sehen könten/wie herrlich vnd köstlich dis gegenwertige Creutz ist/für dem Angesicht GOTTes/vnd der ganzen Himlischen Gemeinschaft/auch für allen Christen/die noch mit vns auff Erden leben.

Aber wir sind solche arme Lent/das wir/vnserer fleischlichen weisheit nach meinen/Es stehe nimermehr besser/denn wenn wir inn guthem friede/vnsern handel treiben vnnd gewin suchen können/Item/wenn wir inn vnsern Gerthen/Spielen/Tanzen/vnnd bancketiren mögen. Aber der heilige Geist vrteilt viel anders. Es helt sich auch inn der warheit viel anders. Denn Gott sagt/Er wölle bey vns sein inn der nott/sagt nicht von der zeche oder bancketiren. Item/vnser todt sey ein vberaus köstlich ding für seinen Augen. Item/das wir dem Sone Gottes inn diesem zeitlichem Creutz müssen gleichförmig werden/auff das wir mit ihm im Himmelreich/vnnd inn ewiger freuden vnd seligkeit darnach leben/regieren vnd herschen.

Darumb bitt ich alle Christen vmb Gottes willen/das sie die giftige anfechtunge des Teuffels von sich schlagen/gedültig sein im Creutz/widder Gott nicht zürnen/murren/noch grisgramen/Sondern sich mit dem wort Gottes trösten vnd vnterrichten/vnnd bereit sein/Gott zu gehorsamen/Es sey zum leben oder zum tode/das sie ihm ihre leibe/als lebendige opffer auffopffern/Auch brünstiglich one vnterlas/den himlischen Vater aller barmhertzigkeit/von welchem alles gute von oben herab kömpt/bitten/das er vns widder die wütereij der Pharaonen/des Antichrists/vnd seiner Diener/zu ehren seines namens/vnnd zu erbawung seiner armen Kirche/gnediglich behüten/vnd bewaren wölle.

Werden wir solchs thun/So wollen wir on allen zweiffel hoffen/der barmhertzige Vater/werde vns zu seiner zeit/mit seiner gnade vnnd hülff/gewislich beystehen/vnd vns nicht lassen zu schanden werden.

B ij

Der Herr

Der Herr Ihesus stercke vnnnd eröste vns / auff das wir Gott  
mehr denn die menschen / das ewige mehr denn das zeitliche / lieben  
vnd fürchten / Er wölle sich auch vnser ein mal gnediglich er-  
barmen / auff das der Antichrist vnnnd seine Gottes-  
lose schar nicht sage / Wo ist nu ihr Gott ?

Myd 226

§ 1718.

*[Faint, mostly illegible text, likely bleed-through from the reverse side of the page.]*

111



Gott  
lieberr

*[Faint, illegible text from the reverse side of the page, likely bleed-through from another manuscript page.]*


X 220685A

261









Q. N. 186, 26.

Yd  
226

**E**in geistlicher trost die-  
ser betrübten Magdeburgischen Kirchen  
Christi / das sie diese Verfolgung  
vmb Gottes worts / vnd keiner an-  
dern vrsach halben / leidet.

Durch Matth. Fl. Illyr.

ij. Cor. i.

Wir haben vns müssen des lebens erwegen / vnnb bey vns be-  
schliessen / das wir müsten sterben. Das geschach aber darumb / das  
wir vnser vertrauen nicht auff vns selbs stellen / Sondern auff Gott /  
der die Todten aufferwecket. Welcher vns von solchen Tode erlöset  
hat / vnd noch teglich erlöset / vnd hoffen auff ihn / er werde vns auch  
hinfurt erlösen.

Außwendig streit , inwendig furcht.

